

Na osnovu člana 63. stav (1) tačka b) Zakona o visokom obrazovanju (Prečišćeni tekst) („Službene novine Tuzlanskog kantona“, broj: 21/21, 22/21, 5/22, 11/22, 16/22 5/25 i 14/25), člana 52. stav (1) tačka b) i člana 295. stav (3) Statuta JU Univerzitet u Tuzli (Prečišćeni tekst) broj: 03-5695-1-2/23 od 18.10.2023. godine, broj: 03-3905-1-1/24 od 09.07.2024. godine i broj: 03-5111-1-1/24 od 19.09.2024. godine, u vezi sa članom 17. stav (1) Pravilnika o uslovima, kriterijima i postupku prijema studenata u studentske domove Studentskog centra Univerziteta u Tuzli broj: 04-4662-2/18 od 04.09.2018. godine, broj: C4-1470-1-4/23 od 15.03.2023. godine i broj: 04-2173-1-1.1/25 od 11.04.2025. godine, Senat Univerziteta u Tuzli na sjednici održanoj 04.02.2026. godine donio je

PRAVILNIK

o kućnom redu, pravima, obavezama i odgovornostima studenata korisnika smještaja u studentskim domovima i ishrane u studentskom restoranu Studentskog centra Univerziteta u Tuzli

I. OPĆE ODREDBE

Član 1.

Ovim Pravilnikom reguliraju se prava, obaveze i odgovornosti studenata korisnika smještaja u studentskim domovima i ishrane u studentskom restoranu Studentskog centra Univerziteta u Tuzli (u daljnjem tekstu: SC i Univerzitet), pravila o korištenju studentskih domova i restorana, pravila o kućnom redu, kao i druga pitanja od značaja za korištenje studentskih domova i restorana.

Član 2.

Odredbe ovog Pravilnika odnose se na sva lica koja su korisnici smještajnih kapaciteta i restorana, lica koja privremeno ili povremeno borave u smještajnim kapacitetima, korisnike poslovnih prostorija, kao i lica koja povremeno dolaze u smještajne kapacitete u okviru SC.

Član 3.

Pod kućnim redom podrazumijevaju se pravila ponašanja studenata korisnika smještajnih kapaciteta i restorana, zaposlenih i drugih lica u objektima i u krugu objekata studentskog doma i studentskog restorana, a u vezi korištenja smještajnih kapaciteta, zajedničkih prostorija, restorana, instalacija, uređaja, opreme, inventara, kao i druga pravila kojima se osigurava mirno i nesmetano korištenje usluga SC, utvrđena ovim Pravilnikom.

Član 4.

Pod terminom student korisnik smještaja podrazumijeva se student koji je zaključio ugovor o smještaju i korištenju zajedničkih prostorija u studentskom domu i/ili ishrani u studentskom restoranu SC (u daljnjem tekstu: ugovor).

II. PRAVA I OBAVEZE STUDENATA KORISNIKA SMJEŠTAJA

Član 5.

(1) Studenti korisnici smještaja imaju pravo:

1. da nesmetano i namjenski koriste smještajne kapacitete, zajedničke prostorije, restoran, instalacije, uređaje, opremu i inventar u skladu sa zakonom i odredbama ovog Pravilnika;
2. na upotrebu tople i hladne vode, električne energije i grijanja smještajnih kapaciteta i zajedničkih prostorija u vremenu predviđenom u ugovoru;
3. na zamjenu posteljine dva puta mjesečno;
4. na osiguranje reda i čistoće u zajedničkim prostorijama i restoranu;

5. na blagovremeno i kvalitetno otklanjanje kvarova u smještajnim kapacitetima, u pravilu 48 sati od prijave kvara;
 6. da koriste prostorije namijenjene za učenje, društvene, kulturno-zabavne i sportske aktivnosti, u skladu s rasporedom koji utvrdi direktor ili drugo ovlašteno lice SC i pod uslovom da se time ne narušava red i mir ostalih korisnika smještaja;
 7. na ishranu u studentskom restoranu u skladu sa zaključenim ugovorom;
 8. da organiziraju proslave i zabavne i kulturne aktivnosti u slučajevima predviđenim ovim Pravilnikom;
 9. da primaju posjete ostalih korisnika smještaja i posjetitelja izvan studentskog doma u skladu s ovim Pravilnikom;
- (2) O ostvarivanju prava studenata korisnika smještaja iz stava (1) ovog člana brine direktor SC.

Član 6.

- (1) Studenti korisnici smještaja mogu u svojim sobama primati dnevne posjete ostalih korisnika smještaja i posjetitelja izvan studentskog doma u periodu od 07,00 do 23,00 sata, a u zajedničkim prostorijama izričito uz pristanak ostalih korisnika i uz poštivanje reda i mira.
- (2) Ako student korisnik smještaja prima posjetitelja izvan studentskog doma, dužan je istu posjetu najaviti portiru u studentskom domu ili referentu za smještaj koji će obavijestiti portira.
- (3) Posjetitelj iz prethodnog stava ovog člana u obavezi je prilikom dolaska u posjetu, evidentirati svoj dolazak na portirnici uz predocjenje lične karte, kao i svoj odlazak.
- (4) Evidencija posjeta studentskom domu vodi se u knjizi posjeta na portirnici na Obrascu br. 1.
- (5) Student korisnik smještaja odgovoran je za narušavanje reda i mira u studentskom domu koje učini posjetitelj.
- (6) Posjetitelji koji ometaju red i mir u studentskom domu ili vrijeđaju dostojanstvo korisnika smještaja ili zaposlenih u studentskom domu bit će udaljeni iz doma.

Član 7.

- (1) Studentima korisnicima smještaja nije dozvoljeno organiziranje proslava u sobama ili zajedničkim prostorijama.
- (2) Izuzetno od odredbe prethodnog stava ovog člana, korisnik smještaja može organizirati proslavu odbrane završnog rada ili svog rođendana uz prethodno odobrenje direktora ili ovlaštenog lica SC u posebnoj prostoriji koju odredi SC, u skladu s raspoloživim kapacitetima.
- (3) Proslava iz prethodnog stava ovog člana može trajati do 24,00 sata uz mogućnost određivanja posebnih uslova za održavanje proslave od strane SC.
- (4) Spisak posjetitelja koji nisu korisnici smještaja, organizator proslave dužan je dostaviti portiru u studentskom domu ili referentu za smještaj, te je dužan nakon završetka proslave prostoriju u kojoj je proslava održana dovesti u uredno stanje.
- (5) Studenti korisnici smještaja mogu organizirati društvene i kulturno-zabavne aktivnosti za druge korisnike doma pod uslovima koje odredi direktor SC.

Član 8.

Student korisnik smještaja ima obavezu:

1. da redovno plaća utvrđenu cijenu usluga SC na način i u rokovima utvrđenim ugovorom i u skladu s posebnim općim aktom Univerziteta;
2. da koristi smještajne kapacitete pažnjom dobrog domaćina, vodeći računa da druge korisnike ne ometa u mirnom korištenju smještajnih kapaciteta, zajedničkih prostorija, poslovnih prostorija i restorana;
3. da čisti i održava sobu u kojoj je smješten, a u zajedničkim prostorijama i restoranu da održava primjerenu higijenu, red i čistoću;
4. da omogućujući ovlaštenom licu SC kontrolu i obilazak smještajnih kapaciteta u skladu s ugovorom i u skladu s posebnim općim aktom Univerziteta;

5. da tokom korištenja prava na smještaj i/ili ishranu odgovornom licu SC prijavi svaki kvar ili oštećenje nastalo u sobi, zajedničkim prostorijama, na inventaru, instalacijama i opremi studentskog doma, odmah, a najkasnije u roku od 24 sata od nastanka kvara ili oštećenja;
6. da tokom korištenja prava na smještaj i/ili ishranu odgovornom licu SC odmah prijavi svaki slučaj i svaku sumnju na pojavu zaraznog oboljenja, te da se podvrgne liječničkom pregledu na zahtjev nadležnog organa;
7. da u slučaju neposredne opasnosti koja prijeti zdravlju i životu ljudi i sigurnosti imovine u smještajnim kapacitetima, odmah obavijesti odgovorno lice SC, a ovisno o prirodi opasnosti i odgovarajuće službe i nadležne organe (policija, vatrogasci, služba hitne pomoći i dr.), te da lično učestvuje u otklanjanju nastale opasnosti ako to od njega budu zahtijevala odgovorna lica SC ili nadležne službe i organi;
8. da se odazove svakom pozivu upućenom od strane odgovornog lica SC odmah, a najkasnije u roku od 24 sata od upućenog poziva, a izuzetno u roku koji odredi odgovorno lice SC ako se pozivu nije mogao odazvati iz opravdanih razloga u roku od 24 sata;
9. da se uzdržava svih radnji kojima se uznemiravaju drugi korisnici, zaposlenici ili kojima se narušava red i mir u smještajnim kapacitetima i restoranu;
10. da pri izlasku iz studentskog doma na portirnici ostavi ključ od sobe;
11. da prilikom ulaska i izlaska iz studentskog doma ili restorana, na zahtjev ovlaštenog lica SC da na uvid svoj važeći lični dokument;
12. da se pridržava svih mjera zaštite od požara i da lično učestvuje u sprječavanju ili otklanjanju opasnosti, nepogoda i posljednica istih;
13. da poštuje odredbe ovog Pravilnika.

Član 9.

U smještajnim kapacitetima SC zabranjeno je:

1. kuhanje i spremanje hrane u sobi;
2. upotreba i držanje trošila električne energije i druge opreme (kuhalo, grijalica, plinska kuhala, rešoi i sl.);
3. bacanje otpadaka i drugih predmeta izvan prostora određenih za odlaganje smeća;
4. unošenje i korištenje cigareta, alkohola, droga i drugih zabranjenih supstanci;
5. sušenje odjeće na prozorima i ostavljanje obuće na prozorima i ispred ulaznih vrata, te odlaganje hrane i drugih predmeta po prozorima;
6. držanje životinja;
7. crtanje ili pisanje po zidovima, namještaju ili bilo čemu što može prouzrokovati štetu;
8. fizičko uklanjanje ovog Pravilnika, odnosno kućnog reda;
9. lijepljenje slika i naljepnica na zidu, vratima i namještaju;
10. ukucavanje eksera i šarafa na zid, vrata i namještaj;
11. iznošenje inventara iz prostora;
12. skidanje ili uništavanje inventarskih oznaka na opremi i uređajima (inventarske pločice i naljepnice);
13. samoinicijativno mijenjanje brave na vratima;
14. montiranje nove ili popravljane instalirane opreme;
15. kockanje i organiziranje kockanja;
16. ustupanje smještajnih kapaciteta drugoj osobi;
17. korištenje smještajnih kapaciteta zajedno s drugom osobom koja nije korisnik;
18. obavljanje obrtničkih i drugih poslova u smještajnim kapacitetima;
19. preprodaja proizvoda i usluga i oglašavanje istih u smještajnim kapacitetima;
20. svaka vrsta diskriminacije i uznemiravanja na osnovu rase, vjerske, nacionalne i etničke pripadnosti, spola ili seksualne orijentacije, te svakog drugog oblika diskriminacije korisnika smještaja i zaposlenih u SC;
21. poduzimanje drugih radnji kojima se nanosi materijalna šteta Studentskom centru ili se narušava ugled Univerziteta.

Član 10.

- (1) Studentima korisnicima smještaja, posjetiteljima i trećim licima zabranjeno je unošenje i držanje vatrenog oružja, bez obzira je li korisnik smještaja, posjetitelj ili treće lice zakonski ostvario pravo na isto.
- (2) Zabranjeno je unošenje eksplozivnih i pirotehničkih sredstava, zapaljivih tečnosti i gasova, kao i svih supstanci koje su opasne po zdravlje ljudi i imovinu.
- (3) Korisnicima smještaja zabranjeno je ostavljanje uključenih uređaja koje koriste u redovnoj upotrebi, kada se korisnici smještaja ne nalaze u smještajnim kapacitetima ili zajedničkim prostorijama (otvorena voda, uključeni električni uređaji, punjači za mobitele, laptopi i sl.).

Član 11.

U smještajnim kapacitetima, zajedničkim prostorijama i restoranu zabranjeno je organiziranje skupova političkih stranaka, njihovih ogranaka, te bilo kakvih političkih skupova i svako drugo izražavanje i zastupanje političkih opredjeljenja u smislu organiziranja protesta, tribina i sl., kao i propagiranje vjerskih pitanja bez odobrenja.

Član 12.

- (1) Univerzitet, odnosno SC obavezni su poduzeti sve potrebne mjere da se u smještajnim kapacitetima osiguraju: nesmetan boravak, red i mir, uslovi za učenje, te uslovi za ostvarivanje prava studenata korisnika smještaja, u skladu s mogućnostima i uslovima utvrđenim općim aktima Univerziteta.
- (2) O pravima, obavezama i odgovornostima studenata korisnika smještaja, pravilima korištenja studentskih domova i restorana, pravilima o kućnom redu, kao i o drugim pitanjima od značaja za korištenje usluga SC, SC je obavezan upoznati sve korisnike na odgovarajući način.

III. ODGOVORNOST STUDENATA KORISNIKA SMJEŠTAJA

Član 13.

Za povrede odredbi ovog Pravilnika i obaveza utvrđenih ovim Pravilnikom i ugovorom, student korisnik smještaja odgovara disciplinski i materijalno.

Disciplinska odgovornost

Član 14.

- (1) Studenti korisnici smještaja odgovaraju disciplinski ako svojim činjenjem ili propuštanjem činjenja povrijede odredbe ovog Pravilnika i obaveze utvrđene ovim Pravilnikom i ugovorom, namjerno ili krajnjom nepažnjom.
- (2) Povrede odredbi ovog Pravilnika mogu biti lakše povrede i teže povrede obaveza studenata korisnika smještaja.
- (3) Lakše povrede obaveza student korisnik smještaja čini ako:
 1. proizvodi buku ili narušava red i mir u smještajnim kapacitetima, odnosno koji narušava njegov posjetitelj;
 2. organizira proslave i aktivnosti u smještajnim kapacitetima i drugim prostorijama doma bez odobrenja, odnosno protivno članu 7. ovog Pravilnika;
 3. se drsko i neprikladno ponaša prema korisnicima smještaja, zaposlenima u domu i drugom osoblju;
 4. na zahtjev ovlaštenog lica ne pokaže lični dokument prilikom ulaska ili izlaska iz studentskog doma ili restorana;
 5. prenosi lažne vijesti koje imaju za cilj uznemiravanje korisnika smještaja;
 6. kuha i sprema hranu u sobi;
 7. upotrebljava i drži trošila električne energije i drugu opremu u smještajnim kapacitetima;
 8. ne omogućujući kontrolu i obilazak smještajnih kapaciteta od strane ovlaštenog lica SC;

9. učinjenu štetu u sobi i zajedničkim prostorijama ne prijavi odgovornom licu SC-a na način i u roku utvrđenim ovim Pravilnikom;
10. ne održava red, higijenu i čistoću u smještajnim kapacitetima;
11. suši odjeću na prozorima i ostavlja obuću na prozorima i ispred ulaznih vrata, te odlaže hranu i druge predmete po prozorima u sobi;
12. drži životinje u smještajnim kapacitetima;
13. upotrebljava smještajne kapacitete protivno njihovoj namjeni;
14. odlaže smeće u zajedničkim prostorima ili baca smeće i slične stvari preko terase ili kroz prozor sobe ili neke druge prostorije smještajnih kapaciteta;
15. iznosi inventar iz smještajnog kapaciteta;
16. fizički uklanja Pravilnik, odnosno kućni red ili se ne pridržava drugih pojedinačnih odluka Univerziteta i SC koje se odnose na smještaj u domu;
17. radi druga činjenja ili propuštanja činjenja koja imaju karakter lakše povrede obaveza.

(4) Teže povrede obaveza studenta korisnika smještaja su:

1. zloupotreba prava na smještaj i/ili ishranu u SC;
2. neplaćanje naknade za smještaj i ishranu u skladu sa zaključenim ugovorom;
3. nepridržavanje ili onemogućavanje provođenja mjera zaštite donesene od nadležnog organa;
4. konzumiranje cigareta, alkohola, droga i drugih opojnih supstanci u smještajnim kapacitetima i restoranu;
5. prodaja, ponuda, kupovina radi prodaje, držanje, prenošenje ili posredovanje u prodaji ili kupovini ili na drugi način neovlašteno stavljanje u promet, podstrekavanje i pomaganje u upotrebi supstanci ili preparata koji su okarakterizirane kao opojne droge, odnosno psihoaktivnih supstanci i supstanci koje se mogu koristiti za proizvodnju opojnih droga;
6. teže narušavanje reda i mira u smještajnim kapacitetima;
7. nepoštivanje naredbi i mjera koje imaju za cilj suzbijanje i sprječavanje zaraznih bolesti i epidemija;
8. držanje, nošenje i upotreba oružja, odnosno eksplozivnih materijala i pirotehničkih sredstava, zapaljivih tečnosti i gasova u smještajnim kapacitetima;
9. namjerno činjenje radnje koja ima za cilj izazivanje opasnosti za osobe i imovinu;
10. namjerno propuštanje radnje kojom bi se spriječila opasnost za osobe i imovinu;
11. učestvovanje u tuči kao napadač ili poticanje drugih na tuču;
12. krivotvorenje dokumenata i isprava na temelju kojih je korisnik ostvario pravo na smještaj i/ili ishranu;
13. ustupanje prava na smještaj i/ili ishranu drugoj osobi, besplatno ili naplatno;
14. krađa imovine korisnika smještajnih kapaciteta, zaposlenika u SC i ostalih osoba;
15. neuredno razduživanje ili propuštanje razduživanja smještaja;
16. nanošenje štete imovini SC-a;
17. podsticanje, organiziranje ili učestvovanje u aktivnostima koje su zabranjene u smještajnim kapacitetima, zajedničkim prostorijama i restoranu;
18. diskriminacija i uznemiravanje na osnovu rase, vjerske, nacionalne i etničke pripadnosti, spola ili seksualne orijentacije, te svakog drugog oblika diskriminacije korisnika smještaja i zaposlenih u SC;
19. ponavljanje lakše povrede obaveza;
20. druga činjenja ili propuštanja činjenja koja imaju karakter teže povrede obaveza ili kojima se grubo krše odredbe ovog Pravilnika i obaveze utvrđene ovim Pravilnikom i ugovorom.

Član 15.

(1) Postupak za utvrđivanje disciplinske odgovornosti studenta korisnika smještaja zbog lakše ili teže povrede obaveza pokreće se zahtjevom kojeg direktoru SC podnosi upravnik za smještaj studenata, na osnovu saznanja ili podnesene usmene ili pismene prijave.

- (2) Postupak iz stava (1) ovog člana može se pokrenuti u roku od 7 (sedam) dana od dana saznanja za povredu obaveze i počinioca, odnosno od dana podnesene prijave, a najkasnije u roku od 30 (trideset) dana od dana kada je povreda učinjena.
- (3) Utvrđivanje odgovornosti studenta korisnika smještaja u pokrenutom postupku i izricanje mjere vrši Disciplinska komisija.
- (4) Disciplinska komisija se sastoji od pet članova od kojih su dva člana iz reda zaposlenih u SC koje imenuje direktor SC, a tri člana su iz reda studenata koje imenuje direktor SC na prijedlog Udruženja studenata "Studenjak" SC.
- (5) Predsjednika Disciplinske komisije imenuje direktor SC.
- (6) Disciplinska komisija ima dva zamjenika članova od kojih je jedan zamjenik iz reda zaposlenih u SC koje imenuje direktor SC i koji mijenja članove Komisije iz reda zaposlenih u SC, a jedan zamjenik je iz reda studenata koje imenuje direktor SC na prijedlog Udruženja studenata "Studenjak" SC i koji mijenja članove Komisije iz reda studenata.
- (7) Disciplinska komisija se imenuje na period od jedne godine.
- (8) Disciplinska komisija radi na sjednicama u punom sastavu i odluke donosi većinom glasova od svih članova.
- (9) O svom radu na sjednicama Disciplinska komisija vodi zapisnik.

Član 16.

- (1) Prije donošenja odluke o odgovornosti studenta korisnika smještaja, Disciplinska komisija će pribaviti pisanu izjavu studenta protiv kojeg je postupak pokrenut, a po potrebi će pribaviti izjave od drugih korisnika smještaja ili zaposlenih u SC, te druge dokaze koji su od uticaja za utvrđivanje činjeničnog stanja u postupku.
- (2) Disciplinska komisija će imati u vidu težinu učinjenje povrede i njene posljedice, stepen odgovornosti studenta korisnika smještaja, okolnosti pod kojima je povreda učinjena, ranije ponašanje korisnika smještaja, ponašanje korisnika smještaja nakon učinjenje povrede i druge olakšavajuće i otežavajuće okolnosti.
- (3) Disciplinska komisija, na osnovu usmenog i javnog raspravljanja, u prvom stepenu izriče mjeru zbog povrede obaveze studenta korisnika smještaja.
- (4) Disciplinska komisija može izreći mjeru samo ako je počinitelj saslušan na raspravi, ali, izuzetno, i bez saslušanja, kada je na raspravu uredno pozvan ali se pozivu, bez opravdanih razloga, nije odazvao.
- (5) Disciplinska mjera zbog odgovornosti za lakšu ili težu povredu obaveza studentu korisniku smještaja izriče se u formi odluke.
- (6) Odluka o izrečenoj disciplinskoj mjeri obavezno sadrži:
 1. ime i prezime studenta korisnika smještaja;
 2. ime jednog roditelja studenta korisnika smještaja;
 3. mjesto i datum rođenja;
 4. podatke o statusu studenta (ciklus i godina studija, fakultet/akademija na koji/u je upisan);
 5. izrečenu disciplinsku mjeru;
 6. obrazloženje koje sadrži tok postupka, utvrđeno činjenično stanje, dokaze koji su u postupku izvedeni, olakšavajuće i otežavajuće okolnosti i dr.;
 7. pouku o pravnom lijeku.

Član 17.

- (1) Zbog utvrđene odgovornosti za povredu obaveza utvrđenih ovim Pravilnikom, studentu korisniku smještaja mogu se izreći sljedeće disciplinske mjere:
 1. Opomena;
 2. Isključenje iz smještajnih kapaciteta za jednu akademsku godinu;
 3. Isključenje iz smještajnih kapaciteta za cijelo vrijeme studiranja.
- (2) Opomena se izriče za lakšu povredu obaveza utvrđenih ovim Pravilnikom.
- (3) Isključenje iz smještajnih kapaciteta za jednu akademsku godinu ili za cijelo vrijeme studiranja izriče se za težu povredu obaveza utvrđenih ovim Pravilnikom.
- (4) O izrečenim disciplinskim mjerama SC vodi evidenciju.

Član 18.

- (1) Protiv odluke Disciplinske komisije iz člana 16. stav (5) ovog Pravilnika, može se uložiti žalba, u roku od 8 (osam) dana od dana prijema iste.
- (2) Žalba se podnosi direktoru SC, putem pisarnice Univerziteta ili putem pošte na adresu SC.
- (3) Po žalbi iz prethodnog stava ovog člana, direktor SC u roku od 15 (petnaest) dana od dana prijema žalbe donosi konačnu odluku.
- (4) Po konačnosti odluke kojom je potvrđena odluka o izrečenoj mjer. isključenja iz smještajnih kapaciteta za jednu akademsku godinu, odnosno za cijelo vrijeme studiranja, direktor SC dužan je u roku od 10 (deset) dana od dana donošenja odluka iz ovog stava otkazati ugovor studentu korisniku smještaja kojem je mjera isključenja izrečena i o konačnoj odluci obavijestiti Komisiju za prijem studenata u studentske domove.

Materijalna odgovornost

Član 19.

- (1) Student korisnik smještaja koji je prouzročio materijalnu štetu u okviru smještajnih kapaciteta, zajedničkih prostorija ili restorana, namjerno ili iz krajnje nepažnje tokom korištenja prava na smještaj i/ili ishranu u SC, dužan je istu nadoknaditi.
- (2) Za štetu koju je prouzročilo više studenata korisnika smještaja, odgovornost je solidarna ako nije moguće utvrditi stepen odgovornosti za štetu svakog studenta.
- (3) Utvrđivanje postojanja štete, visinu učinjene štete, počinitelja štete i okolišta pod kojima je šteta učinjena vrši tročlana komisija koju imenuje direktor SC iz reda zaposlenih u SC.
- (4) Komisija nakon provedenog postupka iz stava (3) ovog člana donosi odluku o utvrđivanju materijalne odgovornosti studenta korisnika smještaja i visini štete.
- (5) Na odluku Komisije o utvrđivanju materijalne odgovornosti, student korisnik smještaja može izjaviti žalbu u roku od 8 (osam) dana od dana prijema odluke.
- (6) Žalba se podnosi direktoru SC, putem pisarnice Univerziteta ili putem pošte na adresu SC.
- (7) Po žalbi iz prethodnog stava ovog člana, direktor SC u roku od 15 (petnaest) dana od dana prijema žalbe donosi konačnu odluku.
- (8) Po konačnosti odluke kojom je potvrđena odluka komisije o utvrđivanju materijalne odgovornosti studenta korisnika smještaja, isti je dužan nadoknaditi pričinjenu štetu u utvrđenom iznosu u roku od 15 (petnaest) dana od dana prijema odluke.
- (9) Ako student korisnik smještaja ne nadoknadi utvrđenu štetu u propisanom roku, protiv istog će se pokrenuti postupak za naknadu štete pred nadležnim sudom.
- (10) Zbog utvrđene materijalne odgovornosti studenta korisnika smještaja, direktor SC može otkazati ugovor o smještaju i/ili ishrani koji je student zaključio.
- (11) Visina materijalne štete utvrđuje se prema tržišnim cijenama oštećene ili uništene stvari.

IV. PRELAZNE I ZAVRŠNE ODREDBE

Član 20.

Sastavni dio ovog Pravilnika čini Obrazac br. 1.

Član 21.

Postupci za utvrđivanje disciplinske odgovornosti i postupci zbog utvrđivanja štete korisnika studentskih domova SC Univerziteta započeti prije stupanja na snagu ovog Pravilnika, okončat će se u skladu s odredbama Pravilnika o kućnom redu, pravima i obavezama studenata u studentskim domovima Studentskog centra Univerziteta u Tuzli broj: 03-3390-11.3./11 od 18.05.2011. godine.

Član 22.

Disciplinska komisija za utvrđivanje postojanja povrede obaveza i odgovornosti studenata u SC-u, imenovana na osnovu odredbi Pravilnika o kućnom redu, pravima i obavezama studenata u studentskim domovima Studentskog centra Univerziteta u Tuzli broj: 03-3390-11.3./11 od 18.05.2011. godine, ostaje u mandatu do njegovog isteka.

Član 23.

Stupanjem na snagu ovog Pravilnika prestaje da važi Pravilnik o kućnom redu, pravima i obavezama studenata u studentskim domovima Studentskog centra Univerziteta u Tuzli broj: 03-3390-11.3./11 od 18.05.2011. godine.

Član 24.

Ovaj Pravilnik stupa na snagu danom donošenja.

UNIVERZITET U TUZLI
SENAT

Broj: 03-642-1-3/26

Tuzla, 04.02.2026. godine

PREDSJEDAVAJUĆI SENATA

Dr.sc. Amir Karić, red.profesor



